

# INUIT ATAQATIGIIT

## Inatsisartuni



UKA 2018/194  
11.10.18  
Aqqaluaq B. Egede

### **Kalaallit Nunaanni aalisarnermi pisarineqartut isumalluutini atuinermut akitsuutaat pillugit Inatsisartut inatsisissaattut siunnersuut.**

(Aningaasaqarnermut Naalakkersuisoq)

Inatsisissatut siunnersuut matumani saqqummiunneqartoq aalisarnermi ingerlatsisunut inuiaqatigiinnullu iluaqutaasussatut siunertaqartinneqarpoq. Aningaasarsiorneq nunatsinni ingerlalluassappat aamma inuussutissarsiorneq ingerlalluartaqarpoq. Inuiaqatigiit isumalluutaannik atuinermi akitsuutit aqcutigalugit inuiaqatigiit inuussutissarsiortullu naapertuunnerpaamik pissarsisarnissaannik Naalakkersuisut anguniagaqarnerat paasilluarparput.

Inatsisartut 2017-imi ukiaanerani ataatsimiinneranni inatsisissap atuutilersup aalisartut ingerlatseqatigiiffiillu ilaannut aalisagaqatigiinnut aalajangersimasunut aalisartunut siunertaanngitsumik naapertuuppallaanngitsumillu inissisimatitsilersimasoq Naalakkersuisut tunngavilersuutigaa. Inuit Ataqatigiinniit tunngavilersuutigineqartut paasilluarpagut. Taamaattorli pisariaqartipparput Inatsisartut Aningaasaqarnermut Ataatsimiititaliaani tamanna itinerusumik tunngavissiorneqarnissaa.

Pissusissamisuunngilarmi Inatsisartut inatsisaata siunertaanngitsumik aalisagaqatigiit ilaannut nalitunerulersitsinissamik siunertatsinnut annikillisisinnaasumik inatsit sunniuteqarsimappat. Isumaqarpugullu sinerissap qanittuani avataasiortunilu aalisarnerup immikkut qanoq sunnerneqarsimanerannik takussutissat tamakkiisut saqqummiunneqarnissaat. Inatsimmi oqaasertaliussat ilaanni sinerissap qanittuani aalisarneq pillugu, imaluunniit, avataasiortunilu aalisarneq pineqarnersoq paasiuminaassinnaasoq maluginiaratsigu.

Inuit Ataqatigiinnut pingaaruteqaqaaq nunatta inuisalu siunissami aningaasarsiornikkut aammalu nunarsuup sinnerani niuernikkut siuarsarneqarnissaasa nukittorsaavigineqarnissaat patajaatsumillu aqqqissuunneqarnissaat qulakkiissallugu. Angorusoqaarpullu ukiut amerlavallaanngitsut qaangiuppata nunatsinni pisuussutitta uumassusillit tunisassiarineqarneranni iluaquteqarsinnaanitta qaffasinnerpaaffissaa anguniarlugu aalisakkanik nalitunerulersitsineq angusimallutigu aningaasarsiornikkut siuariarsinnaassalluta. Soorunami angusaqarumalluta ingerlatseqatigiiffiit, aalisartut aammalu kattuffiit suleqatigilluartaqarparput.

Inuit Ataqatigiinniit eqqaanngitsoorusunngilarput, tassalu aalisarnermut inatsisissap sammeneqarumaartussap nunatsinni aalisarnermik inuussutissarsiutitta siunissaannik nalornisitseqisup atuutilernissaa sioqqullugu akitsuutit inatsisissallu siunissami atasinnaasumik suliarineqarnissaannut assut killiliisarnera ippinnaateqarmat.

Inatsisartunut ilaasortat siunertariniartussaagaluaratsigu, sapinngisamik siunissami allanngorteqattaagassaannngitsunik inatsisinik piffissami sivisuumi atasinnaasunik inatsisiliussalluta. Aalisarnej pillugu inatsisissaq aamma aalisartut siunissami inerisaallutik aningaasaliisinnaanerannut nalornisitsisoq tusallattaalereerparput. Tamanna tamatsinnut peqqinnangilaq, aamma inuussutissarsiornermik inerisaasoqarnissaanik noqqaasunut tamanut iluaqutaanngilaq. Tamatumali unitsissanngilaat Inatsisartut inatsisaannik pissutsinut naapertuukkunnaarsimasunit aaqqissuussigasuarsinnaanerput.

Inuit Ataqtigiit pingaartipparput massakkut nunatsinni suliffissaaleqinerup qaffaseqisup piunera allanngortinniarlugu nunatta avataani aalisakkanik suliareqqiisarnerup nunatsinnut nuukkiartornissaata timitalersuiffiqineqarnissaa. Inatsisissamilu matumani aaqqiissutiginiarneqartut ilaat siunertamik anguniakkatsinnik naapertuuttusoq Naalakkersuisuniit eqqumaffiqineqarsimammat iluarisimaarparput.

Inatsisissatut siunnersuummi avataasiorluni aalisarnermiit akitsuutit atuukkunnaartussat sinerissap qanittuani aalisartuniit matussuserneqarnissaannik paasineqarsinnaasumik atuuttussanngortitsiniarnerup, pingaartumik nunatta kujataani aalisartunut sinerissap qanittuani aalisartunut sunniuteqarnerpaajussagunarpoq. Taamaammat sumiiffiit aalisarfissuurtut taasinnaasavut aammalu sumiiffiit aalisarnermik annertuallaanngitsumik ingerlatsiviusut eqqarsaatigalugit aningaasarsiornikkut sunniutissai qanoq kaaviiartitatigut sunniuteqassanersoq qulaajarneqarsinnaavoq.

Suliassap matuma Aningaasaqarnermut Ataatsimiititaliami suliarineqarnissaa innersuupparput. Nuannaarpugullu inatsisissatut siunnersuut pissutsinut naleqqussaanissamik siunertaqartoq Naalakkersuisut saqqummiussaat naleqqussaanissatsinnut periarfissiimmat.